



Bosnia and Herzegovina
Federation of Bosnia and Herzegovina

CANTON SARAJEVO
Government

Broj: 02-04-29943-17/26
Sarajevo, 11.06.2026. godine

Na osnovu člana 26. i 28. stav (2) Zakona o Vladi Kantona Sarajevo („Službene novine Kantona Sarajevo“, broj: 36/14 - Novi prečišćeni tekst i 37/14 - Ispravka) i člana 8. stav (3) Zakona o naučnoistraživačkoj djelatnosti („Službene novine Kantona Sarajevo“, broj: 26/16), Vlada Kantona Sarajevo je, na prijedlog Ministarstva za nauku, visoko obrazovanje i mlade Kantona Sarajevo, a uz prethodno pribavljeno mišljenje Savjeta za nauku Kantona Sarajevo od 04.06.2026. godine, Vlada Kantona Sarajevo, na 132. sjednici održanoj 11.06.2026. godine, donijela je

O D L U K U
O UTVRĐIVANJU NAMJENE, KRITERIJA I NAČINA RASPODJELE SREDSTAVA ZA
PODRŠKU NAUČNOISTRAŽIVAČKOJ DJELATNOSTI NA PODRUČJU KANTONA
SARAJEVO IZ BUDŽETA KANTONA SARAJEVO ZA 2026. GODINU

DIO PRVI - OPĆE ODREDBE

Član 1.

(Predmet Odluke)

- (1) Ovom odlukom utvrđuju se namjena, kriteriji i način raspodjele sredstava za podršku naučnoistraživačkoj/umjetničkoistraživačkoj djelatnosti na području Kantona Sarajevo iz Budžeta Kantona Sarajevo za 2026. godinu, organizacioni preduslovi za provođenje ove odluke, objavljivanje i provođenje javnog poziva, imenovanje komisije, zadaci komisije za ocjenjivanje prijava/programa/projekata, aktivnosti programa/projekata, kao i druga pitanja vezana uz raspodjelu i dodjelu sredstava.
- (2) Odluka uključuje opće i posebne kriterije koje Ministarstvo za nauku, visoko obrazovanje i mlade Kantona Sarajevo (u daljnjem tekstu: Ministarstvo) kao davalac sredstava treba primjenjivati prilikom objave javnih poziva, dodjele sredstava iz Budžeta i izvještavanje o provedenim postupcima.
- (3) Opći principi na kojima se ova odluka zasniva su: princip zakonitog, namjenskog, transparentnog, efikasnog i ekonomičnog raspolaganja i utroška budžetskih sredstava.

Član 2.

(Rodna neutralnost izraza)

Izrazi koji su radi preglednosti dati u jednom gramatičkom rodu u ovoj odluci se bez diskriminacije odnose na oba spola.

Član 3.

(Sredstva)

- (1) Sredstva za podršku naučnoistraživačkoj/umjetničkoistraživačkoj i istraživačkorazvojnoj djelatnosti na području Kantona Sarajevo u 2026. godini, osigurana su u iznosu od 4.400.000,00

KM (slovima: četirimilionačetiristotinehiljada i 00/100 konvertibilnihmaraka) u Budžetu Ministarstva za nauku, visoko obrazovanje i mlade za 2026. godinu, na poziciji ekonomski kod 614300, funkcija 098, subanalitika QAN002, Transfer neprofitnim organizacijama – nauka, a ista će se dodijeliti putem javnih poziva.

- (2) Finansijska podrška dodjeljivat će se Korisnicima sredstava (u daljnjem tekstu: Korisnik sredstava) na osnovu sporazuma, ugovora i odluka ministrice za nauku, visoko obrazovanje i mlade (u daljnjem tekstu: Ministrica), a na prijedlog posebno formiranih komisija.
- (3) Odobrena sredstva će se koristiti na način kako je to propisano potpisanim sporazumom i/ili ugovorom o implementaciji projekta/programa.

DIO DRUGI – RASPODJELA /NAMJENA SREDSTAVA

Član 4.

(Raspodjela/Namjena sredstava)

- (1) Ovom odlukom utvrđuje se način raspodjele sredstava namijenjenih sufinansiranju projekata i programa koji doprinose razvoju naučnoistraživačke, umjetničkoistraživačke i istraživačkorazvojne djelatnosti.
- (2) Sredstva za PROGRAM A.1a, osigurana u iznosu od 2.000.000,00 KM (slovima: dvamiliona i 00/100 konvertibilnihmaraka), dodjeljivat će se putem javnog poziva koji raspisuje Ministarstvo, u skladu sa kriterijima i smjernicama utvrđenim ovom odlukom za program:

Program A.1a: Sufinansiranje naučnoistraživačkih/umjetničkoistraživačkih i istraživačko razvojnih projekata od posebnog interesa za Kanton Sarajevo:

- 1) Osigurana sredstva: 2.000.000,00 KM (slovima: dvamiliona i 00/100 konvertibilnihmaraka)
 - 2) Maksimalan iznos po jednom projektu je 100.000,00 KM (slovima: stotinhiljada i 00/100 konvertibilnihmaraka).
- (3) Sredstva za PROGRAME A.1b, A.1c, A.2, A.3 i A.4, osigurana u iznosu od 2.400.000,00 KM (slovima: dvamilionačetiristotinehiljada i 00/100 konvertibilnihmaraka), dodjeljivat će se putem posebnog javnog poziva koji će raspisati Ministarstvo, a raspodjela sredstava vršit će se u skladu sa posebnom odlukom Vlade Kantona Sarajevo, kojom će se detaljnije utvrditi kriteriji, smjernice i način raspodjele sredstava:
 - a) PROGRAM A.1b: Sufinansiranje naučnoistraživačkih/umjetničkoistraživačkih i istraživačkorazvojnih projekata čiji su nosioci mladi naučnici/istraživači
 - b) PROGRAM A.1c: Sufinansiranje troškova tehničke izrade i odbrane doktorske disertacije na visokoškolskim ustanovama u Kantonu Sarajevo
 - c) PROGRAM A.2: JAČANJE PUBLICISTIČKIH DJELATNOSTI I KAPACITETA ZA INTERNACIONALIZACIJU
 1. Program A.2a: Sufinansiranje izdavanja i indeksiranja časopisa
 2. Program A.2b: Sufinansiranje međunarodnih članarina
 3. Program B.2c: Uvođenje programa/modula/ cikličnih i necikličnih programa na stranim jezicima/ digitalni portali, inovativni materijali koji promovišu dostignuća Bosne i Hercegovine u nauci i umjetnosti (internacionalizacija bez papira, greening)
 - d) PROGRAM A.3: Sufinansiranje organizacije međunarodnih konferencija i događaja na području Kantona Sarajevo
 - e) PROGRAM A.4: Jačanje kapaciteta za apliciranje na istraživačke EU fondove.
 - (4) Ministarstvo će, radi realizacije programa iz stavova (2) i (3) ove odluke, raspisati dva javna poziva za dodjelu sredstava.



Član 5.

(Pravo na podnošenje prijava)

- (1) Pravo podnošenja prijava za sufinansiranje programa definisanih u članu 4. ove odluke, na osnovu objavljenih javnih poziva, imaju korisnici budžetskih sredstava, javne i privatne visokoškolske ustanove, naučnoistraživački instituti, pod uslovom da imaju sjedište, odnosno prebivalište na području Kantona Sarajevo, raspolažu odgovarajućim naučnoistraživačkim kadrom, infrastrukturom i opremom potrebnom za realizaciju projekta/programa, te da predloženi projekti/programi doprinose unapređenju naučnoistraživačke djelatnosti u Kantonu Sarajevo.
- (2) Pravo prijave na javni poziv nemaju udruženja i fondacije, bez obzira na registrovanu ili statutarnu djelatnost.

Član 6.

(Način dodjele sredstava)

Dodjela sredstava iz Budžeta od strane Ministarstva provodi se putem dva javna poziva, u skladu sa kriterijima, smjericama i uslovima utvrđenim Programom utroška sredstava i odlukama Vlade Kantona Sarajevo.

DIO III – KRITERIJI

Član 7.

(Opći kriteriji za dodjelu sredstava)

- (1) Realizacija projekta mora započeti u 2026. godini i biti okončana do kraja 2027. godine, a dodijeljena sredstva se moraju realizovati do kraja 2026. godine za Korisnike sredstava koji su budžetski korisnici Kantona Sarajevo.
- (2) Sredstva se dodjeljuju namjenski Korisniku sredstava za konkretan projekat/program u skladu s odlukom Ministarice, te nije moguće vršiti naknadnu promjenu Korisnika sredstava, niti promjenu samog projekta (npr. umjesto izabranog predložiti drugi projekat odnosno vršiti prenamjenu dodijeljenih sredstava).

Član 8.

(Opći kriteriji za vrednovanje projektnih prijedloga za Program A.1a)

- (1) Dodjela sredstava, za namjene iz tačke 4. ove odluke, će se vršiti na osnovu općih kriterija za PROGRAM A.1a kako slijedi:
 1. Kvalitet i relevantnost projektnog prijedloga;
 2. Struktura i koherentnost projektnog prijedloga;
 3. Usklađenost predloženih aktivnosti sa ciljevima i očekivanim rezultatima projektnog prijedloga;
 4. Izvodivost projektnog prijedloga;
 5. Doprinos razvoju područja istraživanja: naučni doprinosi praktična primjenjivost;
 6. Kompetencija i struktura projektnog tima;
 7. Kvalitet naučne infrastrukture potrebne za realizaciju projekta kojom raspolaže aplikant, te adekvatnost institucionalne saradnje i partnerstva ukoliko je planirana projektom;
 8. Adekvatnost i opravdanost finansijskog plana projektnog prijedloga;
 9. Diseminacija, vidljivost, održivosti i impakt projekta;
 10. Inovativnost i kompetitivnost istraživanja na međunarodnom/nacionalnom nivou.

Član 9.

(Posebni kriteriji)

- (1) Posebni kriteriji za PROGRAM A.1a regulišu se smjericama koje su sastavni dio ove odluke.



Član 10.

(Cilj, indikatori učinka i izvori verifikacije)

- (1) Cilj dodjele sredstava iz člana 3. ove odluke je podrška projektima/programima koji doprinose razvoju naučnoistraživačke/umjetničkoistraživačke i istraživačkorazvojne djelatnosti u Kantonu Sarajevo, za implementaciju programa nauke definisanih u članu 4. ove odluke.
- (2) Indikatori učinka su realizovani programi na osnovu dodijeljenih grant sredstava iz člana 4. ove odluke.
- (3) Izvori verifikacije za utvrđivanje učinka su narativni, finansijski izvještaji i terenske posjete.

Član 11.

(Ocjena prijedloga projekta/programa)

- (1) Komisija za razmatranje i evaluaciju pristiglih aplikacija/prijava iz člana 15. ove odluke ovlaštena je da u postupku vrednovanja aplikacija/prijava, pored utvrđivanja formalno-pravne ispravnosti ocjenjuje i naučnoistraživački potencijal, te relevantnost projekta u odnosu na kriterije i uslove utvrđene pozivom (za PROGRAM A.1a) i u skladu s tim vrši vrednovanje/bodovanje projekta.
- (2) Na internet stranici Ministarstva objavit će se i lista dobitnika sredstava za PROGRAM A.1a, nakon provedene procedure prikupljanja aplikacija, evaluacije istih i potpisanih sporazuma.
- (3) Na internet stranici Ministarstva objavit će se preliminarana lista dobitnika sredstava u roku od 60 dana.
- (4) Po okončanju roka za podnošenje prigovora na preliminarnu listu, ministrica donosi odluku o izjavljenim prigovorima i utvrđuje odluku sa konačnom listom dobitnika sredstva i iznosom za svakog dobitnika sredstava po javnom pozivu za PROGRAM A.1a.
- (5) Na osnovu odluke sa konačnom listom dobitnika sredstava po PROGRAMU A.1a i utvrđenim iznosom za svakog dobitnika sredstava će se vršiti isplata dodijeljenih sredstava.
- (6) Obaveze dobitnika sredstava će preciznije biti definisane ugovorom sa Ministarstvom za nauku, visoko obrazovanje i mlade Kantona Sarajevo.

Član 12.

(Kriteriji za vrednovanje projektnih prijedloga i evaluacija prijedloga)

- (1) Pri razmatranju podnesenih aplikacija vrednuje se:
 - a) kvalitet projekta i njegov doprinos implementaciji programa u skladu sa definiranim kriterijima;
 - b) finansijski i operativni kapaciteti aplikanta, uključujući procjenu realiziranih projekata/programa u protekle tri godine, prethodno ostvarena saradnja s međunarodnim partnerima i članstvo u međunarodnim i evropskim mrežama i asocijacijama;
 - c) održivost projekta i projektnih rezultata u periodu nakon završetka projekta;
 - d) izvodljivost projekta, projektnih aktivnosti, jasna povezanost cilja projekta s projektnim aktivnostima, broj Korisnika sredstava koji su obuhvaćeni projektom;
 - e) troškovna efektivnost aktivnosti, odnosno usklađenost predviđenih troškova sa ukupnim budžetom projekta i jasna vidljivost traženih sredstava za svaku od planiranih aktivnosti u okviru projekta.

DIO IV – POSTUPAK DODJELE SREDSTVA

Član 13.

(Postupak i način dodjele sredstava)

- (1) Ministarstvo putem javnih poziva objavljuje postupak i način dodjele sredstva iz tekućeg granta, za PROGRAM A.1a, kao „Javni poziv za sufinansiranje naučnoistraživačkih/umjetničkoistraživačkih i istraživačkorazvojnih projekata i programa iz Budžeta Kantona Sarajevo za 2026. godinu“, na web stranici Ministarstva i objavljuje obavještenje o javnom konkursu u dnevnim novinama.
- (2) Javni poziv je otvoren 30 dana od dana posljednje objave.



- (3) Neblagovremene i nepotpune prijave ne uzimaju se u razmatranje.

Član 14.

(Potrebna dokumentacija i način dostavljanja)

- (1) Podnosilac aplikacije za dodjelu sredstava iz tekućeg granta za PROGRAM A.1a prijavljuje se na „Javni poziv za sufinansiranje naučnoistraživačkih/umjetničkoistraživačkih i istraživačkorazvojnih projekata i programa iz Budžeta Kantona Sarajevo za 2026. godinu“ elektronskim putem i putem protokola i dostavlja prijavu u skladu sa definiranim uslovima za prijavu, kriterijima za ocjenu projekata/programa i obrascima za prijavu.
- (2) Ministarstvo će utvrditi dokaze o ispunjavanju uslova koje je potrebno da aplikanti prilože prilikom prijave na javni poziv za PROGRAM A.1a, kao i strukturu i sadržaj aplikacije koja se dostavlja za sufinansiranje po javnom pozivu.

Član 15.

(Imenovanje i zadaci Komisije za evaluaciju aplikacija - PROGRAM A.1a)

- (1) Ministrica imenuje Komisiju za razmatranje i evaluaciju zaprimljenih projekata iz PROGRAMA A.1 na osnovu objavljenog Javnog poziva za „Sufinansiranje naučnoistraživačkih/umjetničkoistraživačkih i istraživačkorazvojnih projekata i programa iz Budžeta Kantona Sarajevo za 2026. godinu (u daljnjem tekstu: Komisija).
- (2) Komisija ima neparan broj članova, a sastoji se od najmanje sedam članova i sekretara.
- (3) Prije početka rada komisije predsjednik, svi članovi komisije i sekretar potpisuju izjavu o nepristrasnosti, povjerljivosti i nepostojanju sukoba interesa, odnosno da su upoznati sa obavezom da su tokom cijelog postupka rada u komisiji dužni prijaviti mogući sukob interesa i tražiti isključenje iz rada komisije.
- (4) Komisija bliže uređuje djelokrug, način svog rada, zadatke, prava i obaveze članova Komisije putem donošenja Poslovnika o radu.
- (5) Komisija je dužna izvršiti provjeru kompletnosti, formalno-pravne ispravnosti pristigle dokumentacije.
- (6) Komisija je dužna označiti projekte koji su po temi vrlo slični onima koji su finansirani u prethodnim pozivima, kao i one koje implementiraju timovi koji su u prošlogodišnjem pozivu dobili sredstva.
- (7) Komisija je dužna izvršiti bodovanje prema evaluacionim obrascima, za subjekte koji su dostavili dokumentaciju u skladu sa članom 14. ove odluke, u postupku kojim će utvrditi objektivna i provjerljiva mjerila na osnovu kojih se stiče minimalan broj bodova koji je neophodan za sufinansiranje programa po dostavljenoj aplikaciji.
- (8) Komisija je dužna da za svaku aplikaciju osigura recenzije najmanje dva recenzenta koji su specijalisti u oblasti za koju je podnesen prijedlog projekta iz PROGRAMA A.1a Recenzenti popunjavaju evaluacioni obrazac i dostavljaju ga Komisiji. Ukoliko u previđenom roku nisu primljena najmanje dva popunjena evaluaciona obrasca Komisija za takve prijave određuje dva člana Komisije koji su iz oblasti srodnih predmeta prijave koji nezavisno popunjavaju evaluacione obrasce za navedene prijave.
- (9) Komisija je dužna da formira preliminarnu listu i da na osnovu nje i na osnovu prihvatljivih troškova prijedloga projekta predloži iznos sredstava za dodjelu vodeći računa da se za dodijeljena sredstva mogu realizirati aktivnosti, postići određeni rezultati i ostvariti postavljeni cilj.
- (10) Predsjednik i svi članovi Komisije potpisuju sve zapisnike i tabele nastale u okviru rada Komisije.
- (11) Komisija je dužna dati zadatak obaviti najkasnije u roku 90 dana od dana početka rada.
- (12) Komisija podnosi Izvještaj o svom radu Ministrici sa prijedlogom preliminarne liste dobitnika sredstava u kojoj je naznačen rok za podnošenje prigovora.
- (13) Visina naknade za rad članova Komisije će se utvrditi posebnom odlukom Ministrice.

Član 16.

(Odluka sa konačnom listom dobitnika sredstava - PROGRAM A.1a)

- (1) Po okončanju roka za prigovor na preliminarnu listu dobitnika sredstava koju objavljuje Komisija iz člana 15. ove odluke, Ministrica donosi odluku sa konačnom listom dobitnika sredstava i utvrđenim iznosima za svakog dobitnika sredstava, a na osnovu koje će se vršiti ugovaranje i isplata dodijeljenih sredstava.
- (2) Obaveze dobitnika sredstava po javnom pozivu preciznije će biti definisane ugovorom sa Ministarstvom.

Član 17.

(Obavještenja)

- (1) Podnosioci, čije su prijave za dodjelu sredstava odbačene ili odbijene, smatraju se obavještenim objavljivanjem Preliminarne liste dobitnika sredstava na web stranici Ministarstva.
- (2) Podnosioci, kojima su dodjeljena sredstva, smatraju se obavještenim objavljivanjem Odluke o konačnoj listi dobitnika sredstava na web stranici Ministarstva.

Član 18.

(Ugovor o korištenju dodijeljenih sredstava-PROGRAM A.1a)

- (1) Ministarstvo će sa subjektima kojima su odobrena sredstva prema Odluci o konačnoj listi dobitnika sredstava, zaključiti ugovore o korištenju dodijeljenih sredstva.
- (2) Prije zaključivanja ugovora korisnici sredstava se obavještavaju putem web stranice Ministarstva o Odluci i visini odobrenih sredstava, te se od istih traži da u roku od sedam dana, a prije zaključivanja ugovora, dostave:
 - a) revidirani budžet usklađen s odobrenim sredstvima i u skladu sa budžetom u okviru aplikacije;
 - b) revidirani budžet projekta postaje sastavni dio ugovora iz stava (1) ovog člana i isti mora biti potpisan od strane ovlaštenog lica i ovjeren pečatom.
- (3) Prilikom sačinjavanja revidiranog budžeta dozvoljeno je mijenjanje iznosa po budžetskim linijama, ali ne i mijenjanje budžetskih linija.
- (4) Ukoliko Korisnik sredstava ne prihvati uvjete iz ovog člana gubi pravo na korištenje sredstava, te je u tom slučaju dužan o tome pismeno obavijestiti Ministarstvo u roku od sedam dana.
- (5) Ministarstvo, na molbu Korisnika sredstava, može dati saglasnost za produženje roka realizacije projekta maksimalno do šest mjeseci, ukoliko Korisnik sredstava uputi molbu najmanje 60 dana ranije od kraja naznačenog roka provedbe odnosno datuma završetka projekta.
- (6) Korisnik sredstava mora obavijestiti Ministarstvo u pisanom obliku i bez odgađanja o svim okolnostima koje bi mogle ugroziti provedbu projekta/programa ili uzrokovati kašnjenje u njegovoj provedbi.
- (7) U slučaju da okolnosti iz prethodne tačke utiču samo na redoslijed i/ili trajanje jedne ili više projektnih aktivnosti, ali ne uzrokuju kašnjenje u provedbi, Korisnik sredstava bez odgađanja pisanim putem obavještava Ministarstvo o navedenim okolnostima, uz davanje obrazloženja i podnošenje revidiranog plana provedbe projekta.
- (8) Korisnik sredstava može odgoditi provedbu nekih projektnih aktivnosti privremeno, zaustavljajući provedbu svih projektnih aktivnosti, pri čemu navedeno ne utječe na Korisnikovu obavezu postupanja u skladu s preuzetim ugovornim obavezama.

Član 19.

(Izveštaji o implementaciji projekta i utrošku sredstava)

- (1) Korisnik sredstava dužan je Ministarstvu dostaviti narativni i finansijski izvještaj o implementaciji projekta/programa i namjenskom utrošku sredstava.
- (2) Korisnik sredstava, u skladu sa stavom (1) ovog člana, dužan je završni narativni i finansijski izvještaj dostaviti najkasnije u roku od 30 dana od dana završetka projekta, a po potrebi dužan je Ministarstvu svakodobno omogućiti uvid u dokumentaciju i realizaciju projekta.



- (3) Korisnik sredstava je obavezan dodijeljena sredstva sredstva utrošiti namjenski u skladu sa važećim zakonskim propisima, te uredno arhivirati originalne fiskalne račune i ostale propisane računovodstvene isprave za sve troškove nastale po odobrenom projektu u skladu sa važećim zakonskim propisima koji reguliraju ovu oblast.
- (4) Korisnik sredstava je obavezan da Ministarstvu dostavi polugodišnji izvještaj kao i finalni narativni i finansijski izvještaj o namjenskom utrošku odobrenih sredstava.
- (5) Finansijski izvještaj sadrži pregled utroška projektnih sredstava a obavezno sadrži kopije originalnih fiskalnih i ostalih propisanih računovodstvenih isprava za sve troškove nastale po odobrenom projektu u skladu sa važećim zakonskim propisima koji reguliraju ovu oblast.
- (6) Narativni izvještaj se podnosi i u elektronskoj formi radi pohranjivanja u repozitoriju projekata i obuhvata: uvod koji sadrži kratak pregled literature u oblasti istraživanja, ciljeve, očekivane rezultate i opis korištenih metoda i postupaka; realizaciju projekata koja sadrži detaljan opis izvršenja akcionog plana sa opisom i detaljnim prikazom rezultata istraživanja i diseminacije istih; zaključke koji jasno ističu stepen izvršenja planiranog, te daju sumativni pregled impakta projekta, probleme sa kojima su se suočili prilikom implementacije i finalno, prijedlog proširenja istraživanja i aplikacije.
- (7) Uz izvještaj se dodaje i set aneksa: korištena literatura, spisak sa inventarskim brojevima i mjestom na koje je smještena kupljena oprema, spisak objavljenih publikacija koji su rezultat rada na projektu, dokaze o diseminaciji (spisak događaja, potpise učesnika događaja i/ili snapshot online participanata, slike, prezentacije i sl.).

Član 20.

(Evaluacija i praćenje odobrenih projekata)

- (1) Ministarstvo u saradnji sa Korisnikom sredstava, a u skladu sa Uredbom o dodjeli transfera neprofitnim organizacijama i pojedincima iz Budžeta Kantona Sarajevo („Službene novine Kantona Sarajevo“, broj: 22/21, 13/22, 21/24, 10/25 i 6/26), prati i provodi evaluaciju provođenja finansiranih ili sufinansiranih aktivnosti/programa/projekata što podrazumijeva programsko i finansijsko praćenje i evaluaciju svih obaveza prema ugovoru o dodjeli budžetskih sredstava.
- (2) Evaluacija uključuje:
 - a) analizu narativnog izvještaja o realizaciji projekta na bazi koje se utvrđuje učinak,
 - b) realiziranog projekta,
 - c) analizu finansijskog izvještaja i
 - d) terenske posjete.
- (3) Ukoliko se ustanovi nenamjensko trošenje doznačenih sredstava Korisnik sredstava je dužan izvršiti povrat cjelokupnog iznosa doznačenih sredstava na Jedinствeni račun trezora Kantona Sarajevo u roku od 30 dana od dana kada Ministarstvo pisanim putem to od njega zatraži, u suprotnom pokrenut će se postupak pred nadležnim organom protiv aplikanta koji nije opravdao doznačena sredstva i zabranjuje se apliciranje istom na konkurse koje raspisuje Ministarstvo u periodu od tri godine.
- (4) Ukoliko Korisnik sredstava nije utrošio cjelokupna doznačena sredstva za realizaciju odobrenog projekta, dužan je da, uz pisano obrazloženje izvrši povrat neutrošenih sredstava uplatom istih na Jedinствeni račun trezora Kantona Sarajevo u roku od 30 dana od dana završetka projekta.
- (5) Ukoliko se sredstva ne uplate u navedenom roku pokreće se postupak pred nadležnim organom protiv Korisnika sredstava koji nije opravdao doznačena sredstva i zabranjuje se apliciranje istom na konkurse koje raspisuje Ministarstvo u periodu od tri godine.



DIO V - ZAVRŠNE ODREDBE

Član 21.

(Preraspodjela sredstva i izvještavanje prema Vladi Kantona Sarajevo)

- (1) Ukoliko sredstva iz tačke 3. ove odluke ne budu utrošena u cijelosti za programe utvrđene tačkom 4. ove odluke, ministrica će izvršiti preraspodjelu preostalih sredstava za namjene predviđene ovom odlukom.
- (2) Izvještaj o utrošku sredstava iz tačke 3. ove odluke Ministarstvo podnosi Vladi Kantona Sarajevo u skladu sa zakonom.

Član 22.

(Stupanje na snagu)

Ova odluka stupa na snagu danom donošenja, a objavit će se u „Službenim novinama Kantona Sarajevo“.



Dostaviti:

1. Predsjedavajući Skupštine Kantona Sarajevo,
2. Zamjenici predsjedavajućeg Skupštine Kantona Sarajevo (3x),
3. Premijer Kantona Sarajevo,
4. Ministarstvo za nauku, visoko obrazovanje i mlade Kantona Sarajevo,
5. Ministarstvo finansija Kantona Sarajevo,
6. Savjet za nauku Kantona Sarajevo (putem Ministarstva za nauku, visoko obrazovanje i mlade Kantona Sarajevo),
7. Za objavu u „Službenim novinama Kantona Sarajevo“,
8. Evidencija,
9. Arhiva.



SMJERNICE, KRITERIJI I DOKUMENTI ZA PROGRAM A.1a

Ovim dokumentom su za Program A.1a definisane sljedeće oblasti: specifične teme (A), osnovne upute za realizaciju pojedinih stavki koje mogu biti predviđene projektom (B), specifični zahtjevi koje moraju ispunjavati projektni prijedlozi (C), dokumentacija koju treba priložiti pri apliciranju na projekte (D), opći kriteriji za vrednovanje projekata (E), postupak evaluacije i vrednovanja projektnih prijedloga (F).

A - SPECIFIČNE TEME OD INTERESA ZA KANTON SARAJEVO

- (1) Naučnoistraživački/umjetničkoistraživački i istraživačko/razvojni projekti u ovom programu obuhvataju teme iz svih oblasti nauke i umjetnosti. Prednost će imati projekti koji su prilagođeniji specifičnim temama od interesa, te koji doprinose povezivanju ekonomije, višem stepenu internacionalizacije i potiču inovativne pristupe istraživanju (RRI - Responsible Research and Innovation) i primjenu Triple Helix pristupa (povezivanje javne administracije, nevladinog sektora i privrede) u svim područjima kroz koja će biti demonstriran njihov utjecaj na razvoj društvene zajednice:
- a) utjecaj kulturnih manifestacija na društvenu koheziju u Kantonu Sarajevo; uloga kulturnih centara i institucija u očuvanju kulturne baštine, povezanost mladih i kulture u Sarajevu-uključenost, interesi i strategija angažmana u stvaranju savremene umjetnosti; kulturni turizam u Sarajevu: potencijali i izazovi; digitalna transformacija ustanova kulture u Kantonu Sarajevo-izazovi i prilike;
 - b) analiza sportskih potreba i navika građana Kantona Sarajevo; stanje sportske infrastrukture u Kantonu Sarajevo-mogućnosti i prioriteta za razvoj; sport i mladi: utjecaj sportskih programa na zdravlje i integraciju mladih u Kantonu Sarajevo-interesi, prepreke i strategije za veće uključanje; ženski sport u Sarajevu: prepreke i mogućnosti za razvoj; Sarajevo kao centar zimskih sportova: potencijal i izazovi; školski sport u Kantonu Sarajevo; finansiranje sporta u Kantonu Sarajevo-analiza trenutnog sistema i prijedloga modela održivog razvoja; sinergija između sportskih i kulturnih manifestacija u Kantonu Sarajevo; uticaj međunarodnih kulturnih i sportskih događaja na imidž Kantona Sarajevo;
 - c) informacione tehnologije u funkciji upravljanja gubicima i povećanje efikasnosti rada vodovoda;
 - d) integracija obnovljivih izvora energije u sisteme vodosnadbijevanja s ciljem smanjenja troškova i ekološkog otiska;
 - e) uticaj Zakona o stvarnim pravima Federacije Bosne i Hercegovine („Službene novine Federacije BiH“, broj: 66/13 i 100/13) na dalje upravljanje imovinom poslovnih jedinica, sa ili bez svojstva pravnog lica, iz drugih država na području Kantona Sarajevo, pravni rizici i posljedice u postupanju (Aneks G kao dio Sporazuma o pitanjima bivše SFRJ, u odnosu na imovinu koja se tiče Kantona Sarajevo);
 - f) istraživanje uticaja kantonalnih mjera finansijske podrške razvoju male privrede na poslovne performanse korisnika ove podrške;
 - g) uticaj uspostavljanja poslovnih zona: Nova zona Vogošća, Poslovna zona Luka Ilijaš i Poslovna zona Hadžići na povećanje bruto društvenog proizvoda Kantona Sarajevo;
 - h) ispitivanje zemljišta sa aspekta mogućnosti uzgajanja određenih kultura; ispitivanje prisutnosti kontaminacije teškim metalima voća i povrća uzgajanog na području gradskih i prigradskih naselja; uticaj zagađenosti zraka na razvoj i prinos voća i povrća u gradskim sredinama; istraživanje kvaliteta meda namjenjenog javnoj potrošnji, sa akcentom na jačanje analitičkih kapaciteta s ciljem otkrivanja patvorenja meda; istraživanje antimikrobne rezistencije u proizvodima životinjskog porijekla;
 - i) izrada projektnog zadatka za izradu mapa erozija i katastra bujičnih tokova za područje Kantona Sarajevo; izrada mapa erozija i katastra bujičnih tokova za područje Kantona Sarajevo.

- (2) Aplikanti u prijedlogu projekta treba da istaknu jasnu vezu između navedenih specifičnih tema i doprinosa projekta, te diseminacijskih aktivnosti projekta kao i povezivanje nauke, javne administracije, nevladinog sektora i privrede.

(1) PROGRAM A.1a JAČANJE NAUČNE INFRASTRUKTURE

Ovi programi potiču projekte koji su usmjereni na inovativna interdisciplinarna istraživanja:

- a) koja doprinose razvoju Kantona Sarajevo, implementaciji Zelene agende za Zapadni Balkan (https://ec.europa.eu/neighbourhood-enlargement/system/files/2020-10/greenagenda_for_the_western_balkans_en.pdf) koja se temelji na šest područja:
- uvođenje cirkularne i zelene ekonomije koja podrazumijeva kako uvođenje inovativnih poslovnih modela tako i inovativnih i novih tehnologija, tehnika i jačanje cyber-fizičkog okruženja;
 - dekarbonizacija - izvori čiste obnovljive energije, okolišno prihvatljivi sistemi transporta i klimatske promjene;
 - smanjenje zagađenja vode, vazduha i zemlje;
 - održiva poljoprivreda i inovativni i održiviji lanci snabdijevanja hranom;
 - zaštita biodiverziteta i ekosistema;
 - zaštita zdravlja zajednice;
- b) koja doprinose unapređenju kvaliteta života u Kantonu Sarajevo i obuhvataju, ali nisu ograničena na:
- računarsko modeliranje i simulacije prirodnih i tehničkih procesa (STEM oblasti, procesi u okolišu-strujanje zraka/voda, rasprostiranja polutanata, optimizacija rješenja);
 - relevantne teme iz javnog zdravstva, uključujući dijagnostiku, prevenciju i terapiju; razvoj aktivne saradnje i uključivanje sportskih društava i klubova univerziteta kroz sportske susrete, prezentacije različitih tjelesnih aktivnosti u kojima je primjenjiva ili integrirana tjelesna aktivnost; pristupi i intervencije za promociju tjelesne aktivnosti; unapređenje postojeće infrastrukture; procjena programa i smjernica za promociju tjelesne aktivnosti, a što podrazumjeva da dobiveni rezultati definiraju praktične preporuke koje će služiti u svrhu poboljšanja zdravlja populacije;
 - upotrebe alata i tehnike analize podataka, modeliranje sistema i donošenje odluka na bazi podataka; pristupi i intervencije za promociju tjelesne aktivnosti (Informacijski - Bihevioralni i društveni pristup);
 - inteligentne sisteme upravljanja i automatizaciju procesa i sistema;
 - eksperimentalne alate (tehnike) i/ili - teoretske podloge;
- c) interdisciplinarna istraživanja, razvoj i osvajanje tehnika i metoda za rješavanje aktuelnih problema, posebno s ciljem razvoja Kantona Sarajevo (na primjer: zagađenje, okoliš, prirodne nepogode, građevinarstvo i urbanizam, gradska infrastruktura, komunalna energetika, vodo-snabdijevanje, prirodne nepogode, saobraćaj, poljoprivreda, šumarstvo, biotehnologija, zdravstveni sistem, medicinske tehnike i zaštita, sigurnost, digitalizacija i automatizacija, razvoj cirkularne ekonomije i tehnologija, pokretanje inovativne industrije (aditivne proizvodne tehnologije/3D štampanje, energetska tranzicija i sl.)). Program za mlade istraživače potiče inovativna istraživanja u društvenim naukama, humanističkim naukama i umjetnosti kroz koja će biti demonstriran njihov utjecaj na razvoj društvene zajednice;
- d) koja doprinose ispunjenju UN globalnih ciljeva održivog razvoja (UN SDG);
- e) koji doprinose promociji BiH dostignuća u nauci i umjetnosti, te promociji inovativnih oblika internacionalizacije i mobilnosti (virtual);

- f) koji doprinose jačanju kompetencija BiH u kontekstu EU-integracija na polju zakonodavstva, privrede, poljoprivrede, tehnologije, obrazovanja, zdravstva, projekte čija istraživanja služe razvoju društvenih oblasti u kontekstu pristupanja EU.

B - OSNOVNE UPUTE ZA REALIZACIJU POJEDINIH STAVKI KOJE MOGU BITI PREDVIĐENE PROJEKTOM

Prijedlozi projekata svih programa trebaju da budu oblikovani na način da zadovolje sljedeće zahtjeve u vezi strukture troškova i načina implementacije:

- 1) U okviru realizacije projekta može se vršiti nabavka naučnoistraživačke/umjetničkoistraživačke opreme maksimalno do 80% od ukupnog iznosa sredstava koja se traže iz ovog poziva i to opreme koja je nužna za uspješnu realizaciju projektnih aktivnosti i ostvarenje projektnih ciljeva, a koja se obavezno specificira u prijedlogu projekta.
- 2) Ključne aktivnosti u projektu moraju biti provedene od strane projektnog tima te se iste ne mogu podugovarati (nije dozvoljeno angažirati podizvođače ni eksterne eksperte za provođenje cjelokupne/ih aktivnosti).
- 3) Dobitnik sredstava može u realizaciji projektnih aktivnosti koristiti infrastrukturu drugih pravnih subjekata, kao i platiti različite neophodne usluge za podršku procesu istraživanja (prikupljanja svjedočanstava i artefakata) i to maksimalno do 30% od ukupnog iznosa sredstava koja se traže iz ovog poziva,
- 4) Projektni prijedlog može predvidjeti angažman studenata I i II ciklusa, integrisanog i/ili III ciklusa studija, te angažman na post-doktorske istraživačke pozicije maksimalno do 80% od ukupnog iznosa sredstava koja se traže iz ovog poziva za projekat.
- 5) Ukupni troškovi za vođenje projekta i naknade istraživačima koji nisu uključeni u tački 3. ne mogu preći iznos od 10% od ukupnog iznosa sredstava koja se traže iz ovog poziva.
- 6) Troškovi istraživanja na terenu u zemlji i/ili van zemlje koji su predviđeni projektnim prijedlogom mogu se planirati maksimalno do 40%, izuzev projekta iz humanističkih i društvenih nauka koji mogu planirati troškove istraživanja na terenu u zemlji i/ili van zemlje predviđene projektnim prijedlogom maksimalno do 80% od ukupnog iznosa sredstava koja se traže iz ovog poziva.
- 7) Troškovi diseminacije (publikovanja, konferencija, studijskih boravaka i predavljanja projekta) koji su predviđeni projektnim prijedlogom trebaju imati udio maksimalno do 20% od ukupnog iznosa sredstava koja se traže iz ovog poziva.
- 8) Indirektni troškovi (overheads) ne mogu biti viši od 5% od ukupnog iznosa sredstava koja se traže iz ovog poziva.
- 9) Naučnoistraživački/umjetničkoistraživački i istraživačkorazvojni projekti koji uključuju i partnerstva sa drugim međunarodnim i domaćim javnim i/ili privatnim institucijama/pravnim licima koja će učestvovati u implementaciji aktivnosti i u sufinansiranju projekta, imat će prioritet pri odabiru, s tim što se za ta druga pravna lica ne može tražiti sufinansiranje iz sredstava ovog poziva.
- 10) Umjetničko-istraživački projekti koji mogu biti podržani u okviru ovog poziva treba da:
 - a) imaju fokus na stvaralačkim procesima, a koji će rezultirati podizanjem kvalitete umjetničke infrastrukture (nabavka neophodne umjetničke i umjetničko-istraživačke opreme) i produkcije (koncerti, predstave, izložbe i sl.),
 - b) budu otvoreni za interdisciplinarnu saradnju, čime se podstiču stvaralački procesi koji objedinjuju različite segmente umjetničkog djelovanja (scenska, muzička, likovna umjetnost) i tehnologije medija.

C - USLOVI ZA REALIZACIJU PROJEKATA

Projekti trebaju zadovoljiti sljedeće uslove:

- 1) Realizacija projektnih aktivnosti u okviru programa A.1a obavezno obuhvata provođenje istraživanja čiji krajnji rezultat mora biti minimalno objavljen ili prihvaćen za objavljivanje jedan naučni rad u časopisu koji pripada najmanje trećem kvartalu (Q3) po Web of Science (u daljnjem tekstu: WoS) Journal Citation Reports (u daljnjem tekstu: JCR) za oblasti nauka čiji su časopisi indeksirani u Web of Science Core Collection (u daljnjem tekstu: WoSCC), odnosno Scopus SCImago za oblasti društvenih i humanističkih nauka koje nisu pokrivena sa WoSCC, već isključivo Scopus bazom. Za projekte iz oblasti umjetničkih istraživanja potrebno je dostaviti potvrdu, u istom vremenskom rasponu kao pod 2, o realizaciji minimalno jedne javne umjetničke produkcija od društvenog značaja.
- 2) Realizacija projektnih aktivnosti u okviru programa A.1a podrazumijeva da je neophodno potvrdu o objavljivanju, odnosno prihvatanju naučnog rada koji je u skladu sa navedenim uslovom, dostaviti najkasnije dvije godine nakon isteka roka koji je u aplikaciji predviđen za okončanje projekta. Voditelj/ica projekta ne može aplicirati na novi projekat sve dok ne dokaže da je rad iz stava 1, iz prethodnog projekta na kojem je voditelj, prihvaćen za objavljivanje.
- 3) Voditelj/ica projekta iz oblasti umjetničkih istraživanja ne može aplicirati na novi projekat sve dok ne dokaže da je umjetnička produkcija realizovana.
- 4) Voditelj/ica projekta se može pojaviti u ulozi voditelja/ice na samo jednom projektu.
- 5) Realizacija projekta mora započeti u 2026. godini i biti okončana do kraja 2027. godine, a dodijeljena sredstva se moraju realizovati do kraja 2026. godine.
- 6) Da je voditelj/ica projekta državljanin/ka Bosne i Hercegovine, naučni/a radnik/ca sa stepenom doktora nauka iz oblasti u koju spada projekat, a uvažavajući specifičnost interdisciplinarnih projekata, te da je u radnom odnosu ili angažovan/a duže od jedne godine od dana objave Javnog poziva u ustanovi koja ima sjedište na području Kantona Sarajevo.
- 7) Voditelj/ica projekta iz oblasti umjetnosti treba ispunjavati slijedeće uvjete:
 - a) da posjeduje najmanje stepen magistra umjetnosti;
 - b) najmanje jedan projekat iz oblasti umjetnosti (izložbe, koncerti, pozorišne predstave i filmovi) od izuzetnog društvenog značaja koji su realizirani u posljednjih pet godina.
- 8) U svojstvu voditelja/ice projekta može biti angažovan/a član/ica Akademije nauka i umjetnosti Bosne i Hercegovine i profesor/ica emeritus, a penzionisani naučni radnik može biti angažovan u svojstvu člana tima ili konsultanta odnosno vanjski saradnik.
- 9) Da naučnoistraživački/umjetničkoistraživački ili istraživačkorazvojni tim minimalno mora biti sastavljen od voditelja/ice projekta i dva istraživača/ice (npr. iz reda saradničkih i istraživačkih zvanja, post-doktoranta, studenata II i III ciklusa studija, te studenata I ciklusa i/ili integrisanog studija).
Izuzetak iz prethodnog stava su projekti namijenjeni prevashodno za formiranje ili proširenje/obnavljanje eksperimentalne infrastrukture (laboratorijska ili terenska mjerenja), a što se pokazuje prijedlogom budžeta koji ima minimalno 60% udjela opreme u ukupnom planiranom iznosu projektnog prijedloga, u kojem slučaju istraživački tim mora biti sastavljen najmanje od voditelja/ice projekta i jednog istraživača/ice iz reda saradničkih/istraživačkih zvanja, post-doktoranta ili studenta/ice III ciklusa studija.

D - DOKUMENTACIJA KOJU TREBA PRILOŽITI PRI PODNOŠENJU PRIJEDLOGA PROJEKTA

D.1 - Za pravno lice koje aplicira obavezno je priložiti slijedeću dokumentaciju (obraci dokumentacije će biti utvrđeni javnim pozivom):

Narativni i finansijski dio projekta:

1. Projektni prijedlog (potpisuje rukovodilac pravnog lica i ovjerava pečatom pravnog lica);
2. Budžet projekta/finansijski proračun;

3. Biografije i bibliografije;
4. Lista recenzenata;
5. Saopštenje;
6. Kontrolni obrazac.

Administrativni dio projekta:

7. Administrativni podaci (potpisuje rukovodilac pravnog lica i ovjerava pečatom pravnog lica);
8. Izjava (potpisuje rukovodilac pravnog lica i ovjerava pečatom pravnog lica);
9. Izjava (potpisuje voditelj/ica projekta i ovjerava kod nadležne općinske službe).

Dodatno, privatne naučne institucije trebaju priložiti:

10. Rješenje o registraciji (fotokopija ovjerena kod nadležne općinske službe, ne starija od 6 mjeseci);
11. Rješenje o poreznoj registraciji - ID broj (fotokopija ovjerena kod nadležne općinske službe, ne starija od 6 mjeseci).

D.2 - Za voditelja/ice projekta obavezno je priložiti sljedeću dokumentaciju:

1. Uvjerenje o državljanstvu (fotokopija ovjerena kod nadležne općinske službe);
2. Dokaz o radnom statusu/angažmanu i izbor u zvanje voditelja/ice projekta u pravnom licu koje kandiduje projekat (original ili fotokopija ovjerena kod nadležne općinske službe);
3. Dokaz da voditelj/ica projekta ima jedan projekat iz oblasti umjetnosti (izložbe, koncerti, pozorišne predstave i filmovi) koji su realizirani u posljednjih pet godina (samo za umjetničke i umjetničkoistraživačke projekte).

E - OPĆI KRITERIJI ZA VREDNOVANJE PROJEKTNIH PRIJEDLOGA I EVALUACIJA PRIJEDLOGA

1. Opći kriteriji za vrednovanje projekata su:

- a) Kvalitet i relevantnost projektnog prijedloga;
- b) Struktura i koherentnost projektnog prijedloga;
- c) Usklađenost predloženih aktivnosti sa ciljevima i očekivanim rezultatima projektnog prijedloga;
- d) Izvodivost projektnog prijedloga;
- e) Doprinos razvoju područja istraživanja: naučni doprinos i praktična primjenjivost;
- f) Kompetencije i struktura projektnog tima;
- g) Kvalitet naučne infrastrukture potrebne za realizaciju projekta kojom raspolaže aplikant, te adekvatnost institucionalne saradnje i partnerstva ukoliko je planirana projektom;
- h) Adekvatnost i opravdanost finansijskog plana projektnog prijedloga;
- i) Diseminacija, vidljivost, održivost i impakt projekta;
- j) Inovativnost i kompetitivnost istraživanja na međunarodnom/nacionalnom nivou.

F - POSTUPAK EVALUACIJE I VREDNOVANJA PROJEKTNIH PRIJEDLOGA PROGRAM IMA TRI FAZE:

FAZA 1: Komisija utvrđuje da li projektni prijedlog zadovoljava objektivna i provjerljiva mjerila definisana u ovom pozivu, te obavezne tehničke i formalno-pravne uslove. Samo projekti koji zadovolje prvu fazu biće evaluirani u narednoj fazi.

FAZA 2: Identifikacija minimalno dva recenzenta koji će vrednovati projekat na bazi naprijed navedenih opštih kriterija za vrednovanje na osnovu kojih se stiče minimalan broj bodova koji je neophodan za sufinansiranje naučnoistraživačkog/umjetničkoistraživačkog i

istraživačkorazvojnog projekta. Projekat koji ispunjava formalno-pravne uslove, a ne bude vrednovan minimalnim brojem bodova koji utvrdi Komisija, neće biti sufinansiran.

FAZA 3: Zaključivanje evaluacije od strane Komisije i kreiranje preliminarne liste sufinansiranih projekata.